

殘園記事目錄

卷上

雉河集解圍紀略

生擒李允安徽肅清紀略

記狼山之戰

平羅山圍賊記略

楊柳灣戰降黃中庸記略

降馬永和紀略

追降黃文誥紀略

受降中變紀略

殘園記事

目錄

收復肅州隨營大略

記軍營保舉

記密保摺

記軍律

戒子弟談兵

卷下

肅州糧道始末

關外運糧始末

俞應鈞擅殺回匪十八人案

附俞孔案原稟

甘肅五案記

萬孝子紀略

祖德

母訓

弢園紀事卷上

江都史念祖繩之

雉河集解圍紀略

同治四年四月二十四日僧王戰歿曹州陳國瑞
郭寶昌諸軍盡潰王本軍三省馬隊死亡殆盡豫
東皖三省震恐初僧王偪賊於曹奏調念祖軍得
旨迅赴會皖撫疏留未果往六月初偵賊將回雉
河集老巢雉河集者蒙亳之交一市鎮約四五百
戶耳後改縣治即今渦陽縣也捻賊渠魁悉產潁
壽蒙亳以故沿渦淮數百里皆賊窟雉河集又為

其盟主張樂行故里尤視為必爭之地彼時英果
敏以皖藩奉 旨總統山英強方四軍及馬隊千
人駐鎮雒河集得曹州信定期十五日大校於龍
山山距集十五里五更雲氣蔽天堆集如人形果
敏指示余曰此卧屍雲法當三日下為戰場然探
騎未回賊未必若是之速校罷留黃秉忠統英字
一軍扼龍山明日探賊已入界前後三路號稱百
萬寔約三十餘萬余議出奇兵迎擊以挫其氣乃
挑山字軍死士千五百人十七日黎明馳龍山午
刻賊前隊見余指告黃秉忠曰山後塵氣濃厚是

必三路之前鋒齊集非急擊且包我後今日戰事
發自我我與公約公之五營現已傍壘列十陣矣
願勿輕動視我千五百人盡退守壘不晚遂令牛
師韓劉廷幹分左右余居中同馳陷陣賊一退而
復余三退三復左軍哨官再死牛師韓自執大旗
以代當是時賊百倍於我陷陣已深已雜接不能
辨而英軍十陣齊撤登埤矣右軍劉廷幹素機警
先覩急拔出右軍百人馳援余出險得與牛師韓
同退壘下時我軍已不滿五百然人能遍體血汚
列陣植立賊環視未敢偏移時始退余亦入壘於

是諸將含怨議撤回雒河黃則留余夜行余領之
私告諸將曰今四圍皆賊夜必有游師我軍新挫
昏黑中設遇警潰矣現賊甫四散晚餐立營乘此
急整隊行彼必驚異特抽精兵追擊計可行十里
望見雒河矣諸將領悟立拔隊黃聞余不辭去追
至營門口胡不再謀呼令軍中鼓吹號炮相送余
笑謂諸將曰此曉喻四圍賊也雖然我去若不必
支其愚可憫耳先是偵者報敗果敏以山字自成
軍數十戰未嘗敗不信一更余回營略言戰狀飭
各軍戒備明日將有大戰問英軍余曰不死守禍

更速是夜五鼓聞英軍果潰蓋黃自我拔隊聚諸將謀夜撤雉河行不三里伏兵起不戰而潰黃為賊獲不之識旋脫去明日賊偪雉河沿渦百里諸圩皆降時大軍駐河東土城河西立八壘為犄角中以炮舡三十隻護浮橋日午賊自正西來果敏率諸軍背水列陣余為左翼程文炳以強軍合歐振聲馬軍為右翼將戰西風驟起果敏敕諸陣南移馬軍稍北陣未定風轉西北果敏親吹號促諸軍列舊陣時余與程齊馳中軍執果敏馬轡告曰風一刻而兩變決不可戰速以中軍退果敏猶豫

未答余急以馬軍一虛進則步陣皆退雖無恙矣
果敏忽奮轡呼曰天豈助逆哉今日必戰驟領親
軍千人攻中堅賊亦猛進余與程甫馳本陣戰已
接鎗子澌地如雨雹忽塵沙撲面來頃刻咫尺不
辨蓋大風又正西起敵用馬雜步直壓我中軍而
果敏敗矣敵乃舍中軍夾攻我左右翼左右翼皆
敗歐以騎北走意使不敢追追則可搶風繞後余
則僅與劉廷幹三百餘人游戰緩退當此之時瞬
息變態四顧不見果敏旗不及救法亦不當救但
覺三面皆敵士卒受鎗者左右仆而已將及河余

目視劉劉遽反身呼曰入水盡死衆弟兄速隨我
殺賊士氣聞呼一振哭然盡回撲賊出不意為之
一却余遂大呼曰賊敗矣八營登埤之士萬聲群
噪曰賊敗矣於是見果敏之旗由岸底繞而南進
擊其腰歐之騎兵由北趨西截其後而賊大敗矣
劉固精技勇余嘗歎苟世無火器足稱萬人敵一
矛盪決士卒為之狂奮追奔二里許急收隊是役
也險絕而倖勝賊雖死逾二千僅損百一而我軍
寔又忘精卒千人大勢已去不可復戰矣明日賊
進河西遙立一百二十餘壘恃其衆不欲迫我也

又一日上下游分造浮橋進規河東連營亦百餘
座而圍將合是時鹽猶可入文書可出不一日而
長城築長城三匝成而偃月營又加矣偃月者古
有其名莫知其式自苗沛霖用以圍蒙城咸詫其
巧余視之乃知為偃月其法就長城作一面如弓
之弦再築弓背以合之乃成月形每營相距以二
十步為準用兵可省方營什之七而長城不守自
守也至是而圍真合矣文報斷矣城中人心益惶
惶矣果敏日夕憂歎誓必死先遣勇士持家書玉
珥潁州別父母又思擊其浮橋使東西隔絕然後

與之背城決死戰禱雨乞長河水果大雨而河水
日涸舟師膠馬大駭莫測其故後此十一年晤朗
齋始悟蓋彼時屯軍亳州壅水便道糧運豈知雉
河默受其禍哉賊圍既密日出數十騎營外嬉罵
略謂圍合援絕城中旦暮皆饑殍我不與死人鬪
但預備擒老英耳果敏憤恚極日思仰藥伏劍幸
防之嚴不令獨處然余心頗惴惴爲一日方午張
敬雲部郎與果敏小院閑話余適至果敏歎曰僧
王萃東豫皖三省之精一旦摧之今日各省援絕
固由諸軍震於王之陣歿亦本無強援可望矣雉

河雖非名城顧我既以重兵守一朝失之淮南北
大局尚堪設想耶雖然裨官說部遇急難往往獲
奇策今豈竟束手耶語至此張忽大言曰史大饒
有解圍策公不能用但覓日死奚益果敏大驚曰
弟於我如一人軍中鉅細罔不由弟何至大計不
我告余曰知必不能用耳果敏急起自閉門且曰
弟計必奇速言之余曰賊以三十萬衆圍孤營不
分兵取壽潁循淮南獨蹈苗圍蒙城故轍直下策
也如雉河者祇用二萬人圍三面留糧道以駐守
之使走則不敢戰則不奮乃真坐斃矣今賊貪逸

以為可卧而虜我倘得一旅自外來軍不必精惟
用作內綫以八千死士夾擊此笨賊破之必矣日今
可獨當戰守者惟我與公耳兩虎困一穴毋怪獵
人之瞰戶已外援絕可分我以自援之法公出而
我守公出則宿蒙之民團可集康錦文之軍不敢
不會我守則賊無所挾而氣奪兵知有援而氣壯
自古行大計者貴勇斷一疑豫非英雄矣果敏默
聽久之歎曰我朝行夕潰耳誠知弟不畏死弟與
誰守奈曰無論營務權久屬我公謂諸將有梗我
能盡殲之乎果敏曰能曰然則余平時撫循諸軍

士卒幾各忘其將公所知也今日寔言雖公之尊
士卒親公不如親我兵心屬他何足言公此時豈
猶有所愛慮死於我耶果敏笑顧張曰我縱欲出
奈長圍三匝何余曰有路苟無路半日嚙語也因低
聲曰公晨日登臺不見西山下小箭溝乎再遲加
小壘則生機絕矣果敏凝想拍几大悟曰弟誠奇
才也初城中建三層臺果敏時登以料敵諸將咸
指揮議論余見山下有深澗可繞通山後下流涓
涓計水不深長城築至此中斷余默之識不敢聲
至是始言之張亦豁然歎曰甚己用兵之難也賊

徒三十萬敗此一鰲矣余曰雖然部署正繁也公
先留一手扎略言自出調援兵勅諸軍歸營務處
總統違者死再一札以張為親軍統領不可使丁
吏知用圖章印泥倒蘸於印可也公乘何馬果敏
曰我亦思之今當穿海跳澗非弟之小黃馬不可
特何以對弟張曰馬小如驢公體重而多所挾能
任乎余曰惟其小故戰陣不招鎗不屬目而又喜
超越是以足奇否則公廐良驥寧少耶公宜一更
出令巡營隨從不宜多只小童江春免戈什六七
人余預令馬軍挑八十精騎河西營畔聽調公三